

समे – 12:25 hrs.

<><><><><><>

### PM-Polland Ukrane

प्रधानमंत्री नरेंद्र मोदी होंरें अज्ज आखेआ ऐ जे पोलैंड मध्य यूरोप च भारत दा इक्क प्रमुख आर्थिक भ्याल ऐ ते दौनें मुख्यें आपूं च लोकतांत्रिक दे बन-सबन्नता दे रिश्ते गी होंर निग्गरउ बनाने दा पक्का धेइया कीते दा ऐ। पोलैंड ते यूक्रेन दे दौरे पर खाना होने कोला पैहले उनें आखेआ जे ओह बड़ी बेसब्री कन्ने इस दौरे गी बलगा करदे हे। प्रधानमंत्री नरेंद्र मोदी होंर हुने कोलां किश चिर पैहले पोलैंड ते यूक्रेन दे त्रऊं दिनें दी यात्रा पर खाना होई गेन। वारसा च मोदी हुंदा रस्मी तौरा पर स्वागत कीता जाग। प्रधानमंत्री होंर पोलैंड दे प्रधानमंत्री डोनाल्ड टस्क हुंदे नै गल्लबात करडन ते उत्थूं दे राष्ट्रपति Andrzej Duda हुंदे कन्ने बी मलाटी करडन। मोदी होंर भारतीय समुदाय, बड्डे बपारिक ते प्रमुख भारत विदे कन्ने बी गल्लबात करडन। कुसै भारतीय प्रधानमंत्री हुंदा पोलैंड दा 45 बरे मगरा एह पैहला दौरा ऐ। एह दौरा नेह समें होआ'रदा ऐ जिस्सले दवें मुख्य आपूं च कूटनीतिक रिश्ते गी बनने दे 70 बरे पूरे करा'रदे न। इस दौरे दौरान मोदी होंर पोलैंड ते जामनगर ते कोलापुर बश्कार विशेष रिश्ते गी दर्शाने आहले स्मार्क पर बी जांगन। प्रधानमंत्री होंर यूक्रेन दे राष्ट्रपति Volodymyr Zelensky हुंदे साददे पर 23 तरीक गी उत्थूं दे अधिकारिक दौरे पर जांगन। दौनें देशे दे कूटनीतिक रिश्ते बनने मगरा एह कुसै भारतीय प्रधानमंत्री हुंदा पैहला दौरा होग।

<><><><><><>

### JK Special Summary Revision

केंद्र शासित प्रदेश जम्मू-कश्मीर च मतदाताएं दी गिनतरी च 93 जहार थवां मते दा बाददा दर्ज कीता गेआ ऐ। एहदे अलावा प्रदेश च मतदान केंद्रें दी गिनतरी च बी 209 दा बाददा होई गेआ ऐ। आकाशवाणी दे जम्मू संवाददाता दी रिपोर्ट मुजब मतदाताएं दे फोटू लग्गी दी मतदाता सूचि दा कम्म सफलतापूर्वक सारे 20 जिलें च पूरा करी लैता गेआ ऐ ते खीरी मतदाता सूचिएं गी जारी बी करी दिता गेआ ऐ। एहदे लेई क्वालीफाई तरीक पैहली जुलाई 2024 रक्खी गेदी ही। एहदे तैहत सारे योग्य मतदाताएं दे नाएं गी जिंदी बरेस 18 बरे होई

गेई ऐ, गी सूची च शामिल कीता गेआ ऐ। विशेष नजरसानी आली कार्रवाई तैहत योग्य मतदाताएं दे नां शामिल कीते गए, गलतिएं गी ठीक कीता गेआ ऐ ते नेह होर कम्मं कारवाइएं गी अंजाम दिता गेआ। कुल मतदाताएं दी गिनतरी 88 लक्ख 3 जहार होई गेई ऐ। इंदे च 44 लक्ख 89 जहार मर्द, 43 लक्ख 13 जहार महिलां, ते 168 थर्ड जेंडर मतदाता न। इस बारै गल्ल करदे होई प्रदेश दे मुख्क चुनां अधिकारी पी.के पोले होरें आखेआ जे 18 थ्वां 19 बरे दे युवा मतदाताएं दी गिनतरी च 45 जहार 964 दा बाददा होआ ऐ। इंदे च 24 जहार 310 महिलां न। उनें आखेआ जे 18 थ्वां 29 बरे तगर दे युवा मतदाताएं दी कुल गिनतरी 25 लक्ख 34 जहार ऐ। एहदे अलावा मतदान केंद्रें दी गिनतरी 11 जहार 629 थ्वां बदिए 11 जहार 838 होई गेई ऐ।

<><><><><><>

### JK Polls

केंद्र नै कश्मीर घाटी च औंदे विधानसभा चुनाएं लेई नीम फौजी बलें दियां कोई 300 कंपनियां तैनात कीतियां गेदियां न। आकाशवाणी दे जम्मू संवाददाता नै जानकारी दिती ऐ जे सीआरपीएफ, बीएसएफ, एसएसबी, आई.टी.बी.पी सने बक्ख-बक्ख बलें दियां 298 कंपनियां कश्मीर घाटी दे बक्ख-बक्ख हिस्सें च अजें तोड़ी तैनात कीतियां जाई चुकी दियां न जिंदे च श्रीनगर, हंदवाड़ा, गांदरबल, बडगाम, कुपवाड़ा, बारामूला, बांडीपोरा, अनंतनाग, शोपियां, पुलवामा, अवंतीपुरा ते कुलगाम च तैनात न।

<><><><><><>

### JK-Congress Visit

औंदे विधानसभा चुनाएं गितै पार्टी दिएं तैयारिएं बारै सलाह-सूत्र करने लेई कांग्रेस दे राष्ट्रीय अध्यक्ष मल्लिकार्जुन खड़गे ते लोकसभा च विपक्ष दे नेता राहुल गांधी होरें कल श्रीनगर पुज्जा करदे न। आकाशवाणी दे जम्मू संवाददाता नै जानकारी दिती ऐ जे इस दौरै कोला पैहले अतरुं संगारे पाओर दी इक महत्वपूर्ण बैठक लग्गी ही जेदे च उनें चऊं राज्यें च चुनां रणनीति बारै सोच-विचार कीता गेआ हा जित्थे विधानसभा दे चुनां होने आले न। श्रीनगर दे अलावा उंदा शुक्रवारें जम्मू दे मार्बल मार्केट इलाके च पार्टी कार्रकर्ताएं ते लीडरें कन्नै मलाटी लाने दा कार्यक्रम ऐ श्रीनगर च दवें नेता नेशनल कांफ्रेंस दे प्रधान डॉ. फारूक अब्दुल्ला ते उप प्रधान

उमर अब्दुल्ला हुंदे नै बी मलाटी लांगन। कांग्रेस दे नमें प्रभारी तारिक हमीद करी होरें हाल च गै आखेआ हा जे पार्टी सांझे विचार रखने आली पार्टिएं कन्नै गल्लबात लेई तैयार ऐ।

<><><><><><>

### **BJP-J&K**

बीजेपी नै आँदे जम्मू-कश्मीर विधानसभा चुनांस लेई पार्टी दे नेता राम माधव ते केंद्री मंत्री जी किशन रेड्डी होरें गी चुनांस प्रभारी नियुक्त कीता ऐ। केंद्र शासित प्रदेश च चुनांस 18, 25 सितंबर ते 1 अक्टूबर गी होंगन। बीजेपी दे राष्ट्रीय अध्यक्ष जे.पी.नड्डा होरें राम माधव होरें गी जम्मू-कश्मीर च होने आले विधानसभा चुनां लेई चुनांस प्रभारी नियुक्त कीता ऐ ते एह नियुक्ति तुरत प्रभाव कन्नै लागू होई गई ऐ।

<><><><><><>

### **Rajouri-Hideout**

सुरक्षाबलें राजौरी जिले च आतंकवादिएं दी छप्पने आहली इक थाहर दा पता लाइए उसी नष्ट करी दिता ऐ। पुलस, सेना ते सीआरपीएफ दे सांझे गश्ती दल गी दरहाल इलाके दी घेराबंदी करिए चलाए गेदे तुपाई अभियान दौरान इक्क ठकाने दा पता लग्गा जित्थे रोजमर्रा दे इस्तेमाल दियां चीजां खरी मती गिनतरी च मौजूद हियां जिंदे च रूट्टी पकाने आली रसोई गैस, कंबल ते भांडे वगैरा शामिल न। उआं इस कार्रवाई दौरान कुसै गी बी गिरफ्तार नेई कीता गेआ ऐ ते इयां बझाँदा ऐ जे तुपाई अभियान कोलां पैहले गै आतंकवादी उत्थुआं नस्सी गेदे हे। सुरक्षाबलें उधमपुर जिले दे बसंतगढ़ दे बलोथा इलाके थवां गुफा आला लेखा इक्क थाहरै दा पता लाइए उसी नष्ट करी दिता। उत्थुआं बी खाने-पीने आहलियां किश चीजां बरामद कीतियां गेइयां न। बसंतगढ़ इलाके च संगारे सीआरपीएफ ते पुलस दे इक सांझे गश्ती दल पर होए दे आतंकी हमले दे जेदे च इक इन्स्पेक्टर शहीद होई गेआ हा, दे बाद गै तुपाई आली कार्रवाई तेज करी दिता गई ही।

<><><><><><>